



Шочмо эл, порылык да чын верч!

Будь готов /

22-шо (3670) №,
2024 ий 31 май,
кугарня



0+

Имде лий

1933 ий 1 февраль годсек лектеш.



Икшыве эн яндар чонан, эн весела да поро шинчаончалтышан. Йоча ончыкылыклан волгыдо ўшаным пуа. Икшывын йоча пагытше куанымгына кондыжо да поро шарнымашым кодыжо манын, кугыеншамыч кугу тўткышым ойрышаш улыт. Садланак икымше июньышто тўнямбалне Йочам аралыме кече палемдалтеш.

Йоча – илышын пеледышыже

Ньога кумда илыш корныш икымше ошкылым йочасадыште ышта. Тушто шуко ум пален налеш. Теве Йошкар-Оласе 53-шо №-ан «Изи патыр» йочасадын «Грация» группын воспитанникше-влак илышын у йыжыгышкыже вончат: кум тылзе гыч парт коклашке шинчат. Кодшо арнян йочасадышт, тушто вашлийме йолташышт, авашт гай лийын шушо воспитательышт дене чеверласенят (снимкылаште). Ёдыр-рвезе-шамыч пушкыдо

модыш дене, книга дене куштымашым ончыктенят, почеламутым лудыныт, мурым йонгалтаренят. Вальсым куштымаш ача-аваштын, ончаш мийыше кажне егын чонышкышт поснак логалын. Ончылно – у йолташ ден туныктышо-шамыч, у шинчымаш. Йоча пагыт пеш кўчык, садлан кажне татшым аклыман.

Икшыве-влакым, нунылан илышым пуышо ача-авам Йочам аралыме тўнямбал кече дене саламлена. Тек кажныже пиалан да таза лиеш!

В.МАМАЕВА.

Авторын фотожо-влак.

Увер

5-8 июньышто Йошкар-Олаште И.С.Палантай лўмеш тўвыра да сымыктыш колледжын Калыкле сымыктыш гимназийыштыже (Брюгге урем, 1-ше пўрт) «Марий юнкор-2024» республикысе усталык школ эртаратеш.



Шүдө эн сай радамыште



Йошкар-Оласе шымше но-меран школышто индешымше классыште тунемше Александр Зуев (снимкыште) «Без срока давности» всероссийский сочинений конкурсын иктешлыше йыжынгыштыже сенгышыш лектын. Тудо «Чему нас учит история: нацизм в исторической ретроспективе и неонацизм в современном мире» тагасыште ойыртемалтын. Александр ден наставникше Н.В.Жубрина 7-10 майыште Москошто конкурсым иктешлымаште лийыныт. Рвезын эссе жанр дене серыме «Вре́мён связующая нить...» пашаже «Без срока давности» 100 эн сай сочинений сборникыш пурталтын.

В.МАМАЕВА ямдылен.
Фотом Марий Эл Республикысе Образований да науко министерствын сайтше гыч налме.

Историйым
шергалына

1916 ий 4 июньышто Икымше тўнямбал сар годым генерал Алексей Алексеевич Брусиловын вуйлатымыш почеш руш войска наступленийым тўнгалын.

Пиалан пагыт

Тўрлө тўсан тасмала волгалтше кенеж толын шуын! Мемнан каникул тўнгалын. Ынде жапна ятыр. Яндар южышто капкылым лывырташ чыла йон уло. Мый йўштылаш йоратем. Кодшо ийын сайынак ияш тунемынам. Ировка энер, Овдасола ялысе ер вокте-

не ятыр гана каненна. Ача-авана Ксюша шўжарем дене когылянна кугу да чапле бассейным налын пуэныт. Шокшо игече годым кече мучко юарлаш лиш. Ах, могай куан! Пиалан йоча пагыт.

Алина СУББОТИНА.
2-шо номеран Морко школ.

Чоткар тукым улына

Школыштына йоча толкын Олег Кошевойн лўмжым нумалеш. Пионерийын кечыже вашеш кандашымше классыште тунемше ўдыр-рвезе-влак нылымше классыште тунемше-шамычым Чоткар тукымыш пуртенят. Нунылан кум тўсан галстукым пижыктеныт (снимкыште). Йоча-шамыч сайын тунемаш, эре

ончылно лияш, Шочмо элым йораташ товатленыт. Пайремыште ўдыр-рвезе-влак йоча толкынын «Дорогою добра» да пионер-шамычын «Взвейтесь кострами» мурыштым муреныт.

Эмилия ИЛЬИНА.
Морко, Унчо.
Фотом школ архив гыч налме.



Российысе увер

Ўдыр-рвезе-шамыч, «НИКА» тунемме порталын эртарыме «Правила дорожного движения глазами детей» да «Волшебное мгновение моего лета» конкурслаш ушныза. Тичмаш уверым оценика.рф сайтыште лудса.

«Мои деды ковали Победу!» всероссийский усталык конкурс 31 август марте шуйна. Сенгыше-влакым тўрлө номинацийыште тылзылан кум гана палемдат.

«Символы России. Государственные символы России» всероссийский конкурсыш 10-16 ияш-влакым ушнаш ўжыт. Паша-влакым 30 сентябрь марте вучат. Тўрыс увер – vsekonkursy.ru сайтыште.

Марий Элысе увер

Школышто тунемше да студент-шамыч «Шочмо йылме возаш кумыланд» регион-влак кокласе краеведений конкурсыш ушнен кертыт. Паша-влакым 15 ноябрь марте вучат. marimlande@mail.ru але kugarnya2015@mail.ru адрес дене электрон почтыш йодмашым колтыман.

Йошкар-Олан 440 ияш лўмгечыжлан логотипым ямдыленят. Тушто набережныйын архитектуржым кучылтмо, а 440-ан цифр пёрт леведышым шарныкта. Логотип йомакысе иман чодырам ушештара.

13-17 июньышто «Сосновая роща» тунемме да тренировкым эртарыме базыште самырык краевед-шамычын республикысе слётышт лиш. Йодмашым 5 июнь марте пуыман. Тўрыс увер – rv12.ru сайтыште.

Элым аралыше лийнеже

Мария Осипова (снимкыште) Медведево посёлкысо 3-шо номеран школышто 9-ше «А» кадет классым тунем пытарен. Физкультур, ОБЖ да алгебра предмет-влакым йөрата. Шке ончыкылыкшым сарзе корно дене кылдынеже. Тидлан изинек ямдылалтеш. Спорт дене пенгыде кылым куча. Дзюдош коштын, тангасымашлашке ушнен. Но эн чот куштылго атлетике келша. Куштылго атлетике дене Медведево районын первенствыштыже команде дене кокымшо верыш лектын. Цибикнурышто эртаралтше тангасымаште Мария кумшо верым сенген налын. Тылеч посна музыклан шўман. Сымыктышшколышто флейтымшокташ тунемеш. Туныктышыжо –

О.В.Фищенко-Пулей. Мариям музык дене кылдалтше конкур ден мероприятийлаште чўкыдын ужаш лиш. Мутлан, Все-марийский йоча оркестрыште кок гана шоктен. Озан олаште эртаралтше «Симфония талантов» конкурс гыч III степенян лауреат лўм дене пўртылын. Чебоксарыште кумшо верым сенген налын.

– Спорт дене пенгыде кылым кучымаш ончыкылык професийым ойырымаште кугун полша. Мыланем военный форман еҥ-влак изи годсек келшат. А музык иўм-чоным паремда, – ойла Мария.

Мария Осипова кызит тергыме пашам куча. Руш йылме да математике деч посна биологий



ден обществознаний предметлам ойырен налын. Тек тиде тургым ўдырлан куаным веле конда.

В.МАМАЕВА.

Фотом еш архив гыч налме.

Курымашлык илыше поянлык

24 майыште Славян калыкын возыктышышт да тўвыра кечыштым палемденит. Михайловка книгагудышто ты пайремлан пўлеклалтше «Курымашлык илыше поянлык» увер шагат эртаралтын. Тудым библиотекарь С.В.Моторова эртарен. Вашлий-машке визымше классыште тунемше-влак ушненит. Мероприятий кышкарыште изак-шоляк Кирилл ден Мефодийым, икымше книган авторжо Иван Федоровым

шарналтенит. Книгагудылан корным почшо Ярослав Мудрый кугыжа нерген ойленит.

Ўдыр-рвезе-влак шинчымашыштым келгемденит, тушто гоч книгагала дене палыме лийыныт, калыкмут-шамычым шергалыныт. Куэ кумыжеш славян алфавит дене лўмыштым возаш поснак чот келшен.

Э.СТЕПАНОВА.
Советский район.

Эн лишыл туныктышо

Ныл ий шенгелан кодо. Тўналтыш школ, икымше туныктышо дене чеверласышна. Светлана Леонидовна Степанова мыланна эн шерге да лишыл лийын. Тудо эре полшен, ой-канашым пуэн. Школышто аванам алмаштен. Неле чеверласаш, но илыш ончыко кая. Ме шерге туныктышынам нигунам огына мондо.

Марина СТЕПАНОВА.
Волжский, Упшер.



Салтаклан серыш

Салам лийже, салтак! Мемнан тыныс илышна, пиалан йоча пагытна верч кредалметлан кугу таум ойлена. Вет тыйын гай лўдымў геройлан кўра мемнан вуй ўмбалне канде кава волгалтеш да чевер кече онча. Ме ача-ава пелен илена, пушкыдо киндым кочкына. А тыланда тушто шуко йўсым чыташ логалеш. Орышо тушман ваштареш пенгыдын шогеда. Шкендан илышдам чаманыде кредалыда. Чылан мўнгышкыда таза пўртылза. Ме вучена.

Катя ШАШКОВА.

Оршанке, Кугу Орша.

Снимкыште: 4-ше классыште тунемше-влак салтаклан серышым возенит.

Фотом школ архив гыч налме.



Кокласола – шочмо ялем

Кажне айдемын шочмо верже уло. Мыйын – Морко районысо Кокласола ял. Рушла тудым Коркатово манына. Легенде почеш, Корка курыкышто, кум пушенге коклаште, Коркато луман марий илен. Садлан ялнам Коркатово манын лумденят. Йырваш чодыра лүшкен гынат, ең-влак ты кундемеш веранаш лудын огытыл. Икте почеш весе пörтым чоҥаш тунгалын. Тыге ял шочын. Ялем деч тораште огыл Ылысоло, Шүргысола да Йошкарэҥер улыт.

Шочмо ялем моткоч сылне да мотор верыште шинча. Пүртүс кажнын чонжым куандара. Пакча шенгелнем, мутлан, карьер уло. Тушто кў ден шуным луктыт. Шүргө ерыште отро ийын коштеш. Шочмо кундемем нимушашдымын йöратем!

Ангелина ВАСИЛЬЕВА.
Морко район.

Лишыл кундем

Шочмо-кушмо вершöрем,
Энерсола кундемем.
Лишыл тый мылам улат,
Кажнылан эре кўлат.

Сылне кушкыл пеледеш,
Кайык мура шер теммеш.
Ял воктенысе эҥер
Лойгыкталеш эрден эр.

Ксения БУТЕНИНА.
Морко, Энерсола.



Ксения ЛАСТОЧКИНА
сүретше.
Медведево, Нурма.



Марий Элын рүдолаштыже калыклан эше ик сай каныме вер ешаралтеш. «Жильё и городская среда» нацпроект почеш Сомбатхей кундемыште «Марий паркым» шотыш кондат. Ты пашалан 2022 ийыште пижыныт, тений 1 март гыч тўзаташ тўналыныт. Пашам 31 июлышто мучашлышаш улыт.



Паркыш пурымаште йошкар тўсан тўн капка ден буква-влак торашке волгалтыт. Нуным ужынак, чылажымат ончал савырныме шуэш. Арам огыл каныме верым «Марий парк» манын лумденят. Тудын тўн ойыртемже – марий сынан улмыжо. Каналташ шинчаш тенгыл, лўнгалтыш, шўкшакым кышкыш келыштарыме урно ден стенд-влакым марий тўр дене сöрастарыме. Тушто кугу да изи корно-влак, уремысе кинотеатр, калыкле кухньо кафе, йоча вер, тўвыра мероприятийым эртараш сцене да моло лийыт. Марий парк тек шуко калыкым иквереш уша.

В.МАМАЕВА.
Н.Лаврентьеван фотожо-влак.

Уш-акылет терге!

❓ Марий Эл Республикыште мыняр эҥер уло?

❓ Могай эҥер телымат ок кылме?

❓ Республикыште мыняр ер уло?

❓ Кол лўмым нумалше ер-влакым каласыза.

❓ Шуэн вашлиялтше кушкыл, вўдпўкш (чилим), лач ты ерыште веле шочеш. Могай ер нерген ойлалтеш?

❓ Марий Элыште мыняр кугыжаныш заказник уло?

❓ Марий Элыште кушшо да шуэн вашлиялтше могай кушкыл-влакым Йошкар книгашке пуртымо?

❓ Могай янлык ден кайык-влак шуэн вашлиялтшылан шотлалтыт?

Эн мотор

Мыйын шочмо верем – Арын села. Тудо курыкан да кореман верыште верланен. Вич уреман гынат, нылле кандаш илыме сурт веле кодын. Ожно тиде села Чавайн кундемын рўдö ялжылан шотлалтын. Тунам ялсовет, медпункт, ургымо цех, апшаткудо-влак, школ, черке лийыныт. Кызыт селаштем лач черке веле кодын. Тудо умбаке шумеш волгалт шинча.

Шочмо кундемем эн шерге, мотор, лишыл да йöратыме.

Гавриил АЛЕКСАНДРОВ.
Морко район.

Ушан ой

Шочмо эл, шочмо мланде, эҥер, пасу, чодыра...

Айдемылан тидын деч шергыже мо уло гын?

Г.ЗАЙНИЕВ.

Кенез - йомартле пагыт


Кенез – йоча-влакым йырвел тўня дене палымым ышташ эн келшыше жап. Пўртўсым эскерымаш шуко онгайым пөлекла. Йырвел тўням ончен, шымлен, ньога-шамыч шинчымашыштым пойдарат, ум пален налыт.

Йочасадын модмо площадкыштыже тўрлө копшангым, лывым, пушенге кичкым, лышташ формым, пўртўс вашталтышым эскераш лиеш. Йоча-влак вондер ден пушенгым ойыркалаш тунемыт, саска да смыж нерген шинчымашыштым келгемдат, нунын лўмыштым, ойыртегалтше палыштым (тўсым, кугытым, пушым, тамым) умылен налыт. Насекомый, кайык, янлык-влакын мом кочмыштым, кушто илымыштым, могай пайдам кондымыштым ушештарат. Тыге икшыве-шамыч пўртўсым изинек йбраташ, перегах тунемыт.



Тўрлө кушкылым кучылтын, йоча-влак дене сылне композицийым ышташ лиеш. Тидлан пеледышым, шудым, лышташым ончылгоч поген да коштен ямдылыман. Сўретым ончен, «шудо» шоншым ыштен кертыда. Пашалан ПВА клейым, вашкўзым кучылтман. Тыге йочан фантазийже вянеш, кид лывыргылыкше писештеш.

Мон ўмылжө?



Лаштыкым Медведево посёлкысо 6-шо номеран «Онгыр» йочам вянгдыме рўдерын кугурак воспитательже **Ольга Валерьевна КАЗАНЦЕВА** ямдылен.



Палаш онай

- ✓ Лывын шўмжө уке.
- ✓ Лыве нигунам ок мале.
- ✓ Лыве пайдам веле огыл, энгекымат конден кертеш.
- ✓ Лыве лач Антарктидыште веле огеш иле.
- ✓ Лыве ок коч. Тудо нектар ден вўдым веле йўэш.

Кид йымалысе лупа

Лупа гоч тўрлө кушкылым, копшангым, карым эскераш моткоч онай. Тыгай опыт йоча-шамычлан пеш келша. Лупа уке гын, тудым шке ышташ лиеш. Мутлан, энгыремышым кум литран банкыш шындыза. Банкым плёнко дене лушкыдын петырыза. Плёнко ўмбаке вўдым пыштыза. Чапле лупа ямде. Тудын вошт энгыремышым раш ужаш лиеш.



Чиян кушкыл

Ош тўсан пеледышым погыза. Стаканыш вўдым темыза. Тушко чиям ешарыза. Погымо пеледыш аршашым стаканыш икмыняр жаплан верандыза. А ынде вучаш гына кодеш! Ошалге тўсан кушкыл-влак вес сыным налыт, чиялгат. Тыгаяк опытым пекин ковышта, сельдерей дене ышташ лиеш. Йоча-влак эксперимент гоч кушкылын «вўдым йўмыжым» раш ужын кертыт.



Фокус

Ошман кленча

Тидлан кўлеш: ошма (але тыгыде шўраш), пластик кленча, суши панга.

Пластик кленчаш ошмам тич опташ да суши тоям тушко кералаш. Атым тоя дене нўлтал ончаш: эше шотлан ок тол. Кленча пундашым пералташ, уэш ошмам ешараш. Тыге икмыняр гана ышташ. Варажым тоям кучен, кленчам нўлталаш лиеш.

Пўртўсым шижыт

Пўртўсыштө южо кушкыл да насекомый илыше барометрлан да гигрометрлан шотлалтыт. Гигрометр – южын вўдыжылыкшы ончыктышо прибор. Мутлан, кутко-влак, йўр лийшашым шижын, куткышуэш шылыт. Йўр толшашлан шукш-копшанге-шамыч утларак вяян пушым луктыт. Пўгыльмө сай игечылан почылтеш, йўрлан

петырна. Изи метеостанцийым мўнгыштат ышташ лиеш. Тидлан пўгыльмым окналондемеш пыштыман да эскерыман.





Ой-кагаш лаштык

Поход гыч - таза да куаныше

Тунемме идалыкым му-чашлымек, йоча-шамыч класс дене походыш каят. Энгекыш логалаш огыл манын, нине ой-кагаш-влакым шотыш налман.

- Шкем шот дене кучыман, вуйлатышын шомакшым колышман.
- Йолашым, кужу шокшан тувырым да петыралтше йолчиемым чийыман.



- Пүртүсым пагалыман. Пушенгым тодышман, кугу йүк дене кычкырыман, янлыкым лүдыктыман огыл.
- Палыдыме понгым, кушкылым, смыжым да саскам погыман огыл. Кочкын ончашат огеш лий.
- Пелен шапаш вүдым налман. Кочкыш кокла гыч пүкш, сукара, коштымо фрукт, печене але пряник келшен толыт.
- Шокшо вургем ден алмаштыш йолчием лийшаш.
- Палыдыме предметым ужмек, вигак вуйлатышылан шижтарыман.
- Тулотым коден кайыман огыл.

Ешартыш

Игече сай лишеш гын, Марий Элыште 1 июнь гыч йүштылмө пагытым почаш палемдыме.

Кишке деч шекланыза

Кенеж каникул годым шуко йоча базыш але лагерыш канаш кая. Икшыве-шамыч походыш лекташ йөрлатат. Чодыраште түрлө лүдыкшө вашлиятеш, кишке дечат шекланыман. Энгекыш логалаш огыл манын, тыгай верлаште шкем кузе кучыман? Азапыш логалмек, мом ыштыман? Тидын нерген педиатр Г.А.Чемекова (снимкыште) дене кутырышна.



– Йоча-влаклан походышто пеш түткө лийман. Түшка деч ойырлыман огыл. Шкет кодын, палыдыме верыште йомашат лишеш. Аяран кишке шотышто поснак палыман. Тидын нерген кугыен-шамычланат умылтарыман. Кишкым йонгылыш тошкалат гын, чүнгал кертеш. Тудым тўкалаш але тоя дене вес вере корандаш тыршыман огыл. Кидышкат тўрштен кертеш. Тек кишке шке корныж дене нушкын кая. Походыш лекме годым аптечке пырля лийшаш.

– *Галина Александровна, кишке чўнгалмым кузе пален налаш?*

– Тыгай годым температур кўза, давлений волен кая, укшинчыкта, йол кандалген пуалаш тўналеш, шўлыш петырна.

– *Икымше полышым кузе нуыман?*

– Аяр кап мучко ынже шарле манын, азапыш логалше ег тарваныде кийышаш. Стационарыш нангайыме годымат тыгаяк положенийште лийшаш. Чўнгалме вер деч кўшкырак пенгыдын кылдыман. Пуалмыла коеш гын, кылдышым лүшкыдемдыман. Сусыр верыш стерильный повязкым пыштыман. Черлылан вўдым шуко йўктыман. Туткарыш логалшылан эмлыверыште сывороткым ыштат.

Канышда веселан да пайдалын эртыже манын, пўртўсыштө чот шекланыман. Кугыенгын кангашыжым шотыш налман.

З.ТИМОФЕЕВА.

Фотом еш архив гыч налме.

Шотыш налза

Кенеж – эн сай пагыт. Школышто тунемше-шамычын вучымо каникулышт тўналеш. А тиде яндар южышто утларак жапым эртарымаш, путешествий да, мутат уке, йўштылмаш. Вўд воктене жапым сайын, пайдалын эртараш манын, лўдыкшыдымылык правил-влакым эскерыза.

- ✓ Вўдыш йўштылмө пагытым почмек гына пурыза.
- ✓ Кугыен деч посна вўд воктеке лишемман огыл.
- ✓ Ийын огыда мошто гын, вўдыш пурыман огыл.
- ✓ Йўштылаш лийме нерген палдарыше знак улмо верыште гына йўштылза.

- ✓ Вўдын келгытшым палыде, тушко ида тўрштө.
- ✓ Торах ийын ида кай.
- ✓ Мардежан, кугу вўд толкын годым йўштылаш ида пуру.
- ✓ Пырля ийше-влак деке лишемын, лўмын ида лўдыктыл, мыскарам ыштен, полшаш ида йод.





Фотом школ архив гыч налме.

Пайдале салат

Пакчасаска витаминлан поян манме нерген сайын палем. Тидым мӱнгыштат ойлат. Школышто пайдале кочкышлан пӱлеклалтше мутланымаш-влак эртаралтыт. Икана свежа пакчасаска гыч салатым ыштышна. Туныктышем, мый, пырля тунемме йолташем да полшаш толшо авам дене тамле, тӱнжӱ пайдале салатым ямдылышна. Ковыштам,

кешырым, пурысым, кияр ден помидорым падыштен пыштышна. Витаминлан поян кушкылым да грек пӱкшым ешарышна. Шинчалым пыштен, нӱшмӱй дене варышна. Салатым «Витаминная мозаика» манын лӱмдышна (снимкыште).

Богдан МОСОЛОВ.
Кужӱнер, Йывансола.

Палаш онай

6 июньышто
А.С.Пушкинын
шочмыжлан –
225 ий.



Александр книгам лудаш чот йӱратен. Икымше почеламутшым кандаш ияш улмыж годым француз йылме дене возен.

Точный наукум нимыняр йӱратен огыл.

Сайын сӱретлен. Почеламутшо-влакым шкеак сӱрастарен.

«Евгений Онегин» романым шым ий наре возен.

«Сказка о царе Салтане» произведенийыштыже «ф» букван ик мутым веле кучылтын.

Узник

Мый четлык коклаште, тюрьмаште, шинчем, Кул илышым ужшо арсланым ончем, Йолташ мыйын, рвезе, лупшен шулдырлам, Чӱнга вӱран шылым окна йымалан.

Чӱнга да кышка, шке окнашке онча, Мемнан шонымаш икте-весеыш вонча. Ончалтыш да йӱкшӱ ойлат мом ышташ, А йӱкын маннеже: «Давай чонешташ!»

Ме эрыкан кайык; изай, пагыт пеш! Каяш, кушто курык ошемын пылеш, Каяш, кушто кандын йолгат теныз-влак, Каяш, модыт кушто мардеж мый лачак!..»

А.ТИМИРКАЕВ кусарен.

Министерство культуры, печати и по делам национальностей Республики Марий Эл

РЕСПУБЛИКАНСКИЙ ТЕАТР КУКОЛ

РЕПЕРТУАР на ИЮНЬ 2024

1	СВ	11.00	РУСАЛОЧКА по мотивам сказки Е.Х. Андереена	цена 280 - 380 руб. 1 час 20 минут с антрактом
2	ВС	11.00	СКАЗКА О ГЛУПОМ МЫШОНКЕ музыкальная сказка / для детей с 3 лет	цена 250 - 350 руб. 50 минут с антрактом
8	СВ	11.00	СПИЯЩАЯ КРАСАВИЦА музыкальный спектакль-феерия / для детей с 5 лет	цена 280 - 380 руб. 1 час 20 минут с антрактом
8	СВ	16.00	МУХА-ЦОКОТУХА (малый зал) по мотивам стихотворения К. Чуковского / для детей с 3 лет	цена 350 руб. 45 минут без антракта
9	ВС	10.00	МУХА-ЦОКОТУХА (малый зал) по мотивам стихотворения К. Чуковского / для детей с 3 лет	цена 350 руб. 45 минут без антракта
9	СВ	11.30	БОЛЬШАЯ МЕЧТА МАЛЕНЬКОГО ОСЛИКА лирическая сказка / для детей с 3 лет	цена 280 - 380 руб. 50 минут без антракта
12	СР	11.00	РУСАЛОЧКА по мотивам сказки Е.Х. Андереена	цена 280 - 380 руб. 1 час 20 минут с антрактом
15	СВ	11.00	СЕМЬЯ ДЛЯ МАМОНТЁНКА сентиментальная сказка для семейного просмотра / для детей с 4 лет	цена 250 - 350 руб. 1 час с антрактом
15	СВ	16.00	ТЕАТР НА ЛАДОШКЕ. ВЕСНА (баби-зал) баби-спектакль для детей от 1 года до 4 лет	цена 350 руб. 40 минут без антракта
16	ВС	11.00	ТРИ МЕДВЕДЯ поучительная сказка-игра / для детей с 3 лет	цена 250 - 350 руб. 1 час с антрактом
22	СВ	11.00	ЦВЕТИК-СЕМИЦВЕТИК волшебная история жевачки / для детей с 3 лет	цена 250 - 350 руб. 1 час с антрактом
22	СВ	16.00	КОШКИН ДОМ (малый зал) по сказке С. Маршак / для детей с 4 лет	цена 380 руб. 45 минут без антракта
23	СВ	11.00	ТРИ ПОРОСЕНКА старая сказка на новый лад / для детей с 3 лет	цена 250 - 350 руб. 1 час 15 минут с антрактом
29	СВ	11.00	ПРИКЛЮЧЕНИЯ ПОРОСЁНКА ФУНТИКА сказочная история / для детей с 3 лет	цена 250 - 350 руб. 1 час с антрактом
30	ВС	11.00	ЗОЛОТОЙ КЛЮЧИК приключения деревянного человечка / для детей с 3 лет	цена 250 - 350 руб. 1 час с антрактом

Вилеты можно приобрести в кассе и на сайте театра.
Адрес театра: г. Йошкар-Ола, Царьградский пр-т, 35 Сайт театра: teatrkukolmaried.ru

Касса работает: СР-ПТ 11.30 - 18.00, СВ-ВС 9.00-15.00, выходные - ПН, ВТ.
12 июня касса работает с 9.00 до 15.00, 8, 15 и 22 июня - с 9.00 до 16.00
Телефон кассы: (8362) 45-19-87. Телефон для справок: (8362) 45-25-31.
Для посещения спектаклей в баби-зале необходимо иметь сменную обувь.

Йомак тӱняште

Коркатово лицейыште визымше классыште шинчымашым погышо ўдыр-рвезе-влак «Белоснежка и семь гномов» йомак почеш спектакльым тӱнгалтыш класслаште тунемше-шамычлан модын ончыктеныт. Йоча-влак чот ямдылалтыныт. Ролыым тунемыныт, келшыше костюмым ургеныт. Класс вуйлатышышт Нина Альбертовна Александрова нунылан пеш полшен. Тыршымышт арам лийын огыл. Шольо-шӱжарышт совым рӱж кырен тауштеныт.

В.СМИРНОВ.
Морко район.



0+

Марий Эл
Республикысе
«Марий Эл»
увер агентстве» КАУ.
Директор –
Е.И.КУЗНЕЦОВ.
Тун редактор –
А.Н.ГРИГОРЬЕВА.

Индекс П4696.
Тираж 1550 экз.
Заказ
Формат – А-4-8.

Учредитель-влак:
Марий Эл Республикысе Тувыра,
печать да калык-влакын пашашт
шотышто министерстве,
Марий Эл Республикысе
«Марий Эл» увер агентстве» КАУ.

Редакций да издатель: Марий Эл
Республикысе «Марий Эл»
увер агентстве» КАУ,
424006, Йошкар-Ола,
СССР Вооружённый Вийын 70-ше
идалькыше урем, 20-шо порт.
Тел. 8(8362) 45-22-82.

Газетым редакцийыште
погымо да верстатлыме,
«Марий Эл Республикысе
Правительствын
типографийже» ООО-што
ямде оригинал-макет гыч
савыктыме.
Типографийын адресше:
424000, Йошкар-Ола,
Комсомольский урем, 112.


Печатьыш пумы жап –
14-00, фактически – 13-00.

Авторын да редакцийын
шонымашышт тӱрлӱ лийын кертят.
Сервыш-влак мӱнгеш огыт колталт.
Ак – кутырен келшыме почеш.

https://vk.com/yamde_lii
<https://t.me/yamdelii>
yamde_lii@mail.ru
yamdelii@mediamari.ru
(автор-влаклан)
Сайтын адресше: ямделий.рф

Электротулым аныклена!

- 1.Компьютерыште энергосбережений режимым шындыза. 10 минут деч утла компьютер дене пашам огыда ыште гын, тудо «малыше режимыш» кунна. Тыгодым электротул шагалрак кучылталтеш.
- 2.Телефон ден ноутбукын зарядный устройыштым розетке гыч лукташ мондыман огыл.
- 3.Пылесос дене пашам ыштымеке, шўкшакым погымо мешакшым вигак ястарыман.
- 4.Вургем мушмо машинанаш инструкцийыште палемдыме деч шуко вургемым оптыман огыл.
- 5.Чайникыште йошкыным эре эрыктыман.



Конкурс
 Ёш денае - шошо сомыл.

Ксения НИКОНОВА.
 Йошкар-Ола.

Шотлыза.

	=	<input type="text"/>
	=	<input type="text"/>
	=	<input type="text"/>
	=	<input type="text"/>
	=	<input type="text"/>

Сўретым сўретлен пытарыза да чиялыза.



Ик шырпым верже дене вашталтен, чын вашмутым ыштыза.



Задаче

Мичу 3,5 километрым куржын. Тидыже чумыр дистанцийын 28 процентше лиш. Мичу чылаже мыняр километрым эртышаш?

Куткылан пўртышкыжў миен шуаш полшыза.



5 ойыртемым кычалза.

